

PRANUAR MË:
ACCEPTED ON: 07.12.2022
PRIMLJENO:
Nr.No.Br. 02 / 619



REPUBLIKA E KOSOVËS

KUVENDI I KOMUNËS SË MALISHEVËS

Kuvendi i Komunës

Nr.02/

Datë: 05.12.2022

Në bazë të nenit 11, nenit 12 paragrafi 2 pika (c), nenit 17, nenit 34 par.34.4 neni 40 40.1 shkronja (a dhe l) të Ligjit Nr.03/L-040 për Vetëqeverisjen Lokale, "Gazeta zyrtare e Republikës së Kosovës Nr.28/15 Qershor 2008, Udhëzimin Administrativ nr.02/2019, për organizimin, funksionimin dhe bashkëpunimin e komunave me fshatrat, vendbanimet dhe lagjet urbane, Statutin e Komunës së Malishevës, neni 3, 7, neni 10 par. 10.1 dhe 10.2, Kuvendi i Komunës së Malishevës në mbledhjen e shtatë (IX) të rregullt të mbajtur me datë: 30.11.2022 merr këtë:

V E N D I M

MIRATOHET PROJEKT- RREGULLORIA PËR ORGANIZIMIN, FUNKSIONIMIN DHE BASHKËPUNIMIN E KOMUNËS ME FSHATRAT, VENDBANIMET DHE LAGJET URBANE PËR KOMUNËN E MALISHEVËS

1. Miratohet, projekt -Rregullorja për organizimin, funksionimin dhe bashkëpunimin e komunës me fshatrat, vendbanimet dhe lagjet urbane, në Komunën e Malishevës.
2. Pjesë përbërëse e këtij vendimi është edhe, Rregullorja për organizimin, funksionimin dhe bashkëpunimin e komunës me fshatrat, vendbanimet dhe lagjet urbane, në Komunën e Malishevës.
3. Për zbatimin e këtij vendimi, autorizohet, kryetari i komunës, përmes drejtorëve të drejtorive të Komunës së Malishevës.
4. Pas miratimit nga ana e Kuvendit të Komunës së Malishevës ky vendim hynë në fuqi sipas nenit 81 të Ligjit nr.03/L-040, për Vetëqeverisjen Lokale, si dhe në pajtim me nenin 8 dhe 9 të Rregullores (QRK), nr.10/2019 për shqyrtimin administrative të akteve të komunave, e ndryshuar dhe e plotësuar, me Rregulloren (QRK) nr.06/2021 dhe pas shpalljes në ueb-faqen e Komunës.

Vendimi ju dërgohet:

1. MAPL-së ,
2. Drejtorive kompetente
3. Arkivit të Komunës

Kryesuesi i Kuvendit
Argjend Thaçi





Republika e Kosovës
Republika Kosova
Republic of Kosovo



Komuna e Malishevës
Municipality of Malisheve



PRANUAR MË:
ACCEPTED ON: 10.11.2022
PRIMLJENO:
Nr.Nq.Dr. 02/545

RREGULLORE

PËR ORGANIZIMIN, FUNKSIONIMIN DHE BASHKËPUNIMIN E KOMUNËS ME
FSHATRA, VENDBANIMET DHE LAGJET URBANE

Në bazë të nenit 12 paragrafi 1 dhe 2 shkronja c), nenit 34 paragrafi 1 dhe 4, të Ligjit Nr.03/L-040 për Vetëqeverisje Lokale (Gazeta Zyrtare e Republikës së Kosovës Nr.28/4 Qershor 2008), Udhëzimit Administrativ (MAPL) Nr. 02/2019 Për Organizimin, Funksionimin dhe Bashkëpunimin e Komunës me Fshatrat, Vendbanimet dhe Lagjet Urbane, dhe sipas nenit 14 paragrafi 1 dhe 2 shkronja c) të Statutit të Komunës së Malishevës Nr.01-110-385 të datës 03.12.2008, Kuvendi i Komunës së Malishevës në mbledhjen e mbajtur më datë

Miraton:

RREGULLOREN

PËR ORGANIZIMIN, FUNKSIONIMIN DHE BASHKËPUNIMIN E KOMUNËS ME FSHATRAT, VENDBANIMET DHE LAGJET URBANE

Dispozitat e përgjithshme:

Neni 1

Qëllimi

Kjo rregullore ka për qëllim të rregullojë organizimin dhe bashkëpunimin në mes të Komunës me fshatrat, vendbanimet dhe lagjet urbane, në ushtrimin e aktiviteteve që janë në përgjegjesi dhe kompetencë vetanake të Komunës së Malishevës, sipas Ligjit për Vetëqeverisje Lokale.

Neni 2

Fushëveprimi

Kjo rregullore rregullon mënyrën e organizimit dhe bashkëpunimit në mes Komunës me fshatrat, vendbanimet dhe lagjet urbane duke formuar këshillat lokale si trupa mbështetës të Komunës që të ndikojnë në konsultime gjithëpërfshirëse, të cilat promovojnë dhe zhvillojnë transparencën, llogaridhënien dhe pjesëmarrjen e qytetarëve në proceset e vendimmarrjes.

Neni 3

Formimi i këshillave lokale

3.1 Për të realizuar sa më mirë funksionet dhe përgjegjësitë e parapara me Ligiin për Vetëqeverisjen Lokale, Komuna do të mbështes zgjedhjen e këshillave lokale, fshatrave, vendbanimeve dhe lagjeve urbane me kryetarin. Një këshill lokal mund të përfshijë më tepër fshatra, vendbanime dhe lagje urbane.

3.2 Numri i këshillave lokale të fshatrave, vendbanimeve formale dhe joformale dhe lagjeve do të themelohen në nivele të këshillave lokale dhe janë parashikuar në nenin 4 të paragrafit 4.9 të kësaj rregulloreje.

Neni 4

Formimi i komisionit nga Kuvendi i Komunës për zgjedhjen e këshillave lokale

4.1 Kuvendi i Komunës emëron një komision për të udhëhequr dhe koordinuar punën në terren në zgjedhjen e këshillave lokale. Komisioni duhet të ketë shtatë (7) anëtarë, katër (4) anëtarë nga Kuvendi i Komunës, një (1) anëtar nga ekzekutivi, një (1) anëtar nga shoqëria civile dhe një (1) anëtar nga përfaqësuesit e fshatit, vendbanimit apo lagjes urbane. Komisioni duhet të reflektoj përfaqësimin gjinor dhe etnik. Nga shtatë (7) anëtarët e komisionit tre (3) anëtarë duhet të jenë femra. Përbërja e komisionit duhet të përfaqësoj përbërjen e subjekteve politike me numër më të madh të anëtarëve të përfaqësuar në Kuvendin e Komunës. Kryesuesi i komisionit zgjedhet nga anëtarët e komisionit. Komisioni i raporton Kuvendit për procesin zgjedhor. Mandati i komisionit është i lidhur më mandatin e Kuvendit të Komunës.

4.2 Komisioni i emëruar nga Kuvendi i Komunës, duhet të jetë përgjegjës për caktimin e periudhës kohore të mbajtjes së tubimeve me qytetarë, për zgjedhjen e anëtarëve të këshillave lokale, kryetarin e këshillave lokale të fshatrave, vendbanimeve dhe lagjeve urbane.

4.3 Se paku katër (4) anëtarë të komisionit të Kuvendit të Komunës duhet të jenë të pranishëm në të gjitha tubimet zgjedhore që organizohen për zgjedhjen e këshillave lokale.

4.4 Komisioni i emëruar nga Kuvendi i Komunës dhe përfaqësuesit e fshatrave, vendbanimeve dhe lagjeve urbane, bashkëpunojnë në mënyrë që të organizojnë zgjedhjen e anëtarëve të këshillave lokale, kryetarët e këshillave lokale.

4.5 Të gjithë qytetarët pjesëmarrës në tubimin zgjedhor mund të paraqesin ankesat e tyre, nëse konstatojnë ndonjë parregullësi gjatë procesit zgjedhor. Komisioni i emëruar nga Kuvendi i Komunës është i obliguar që t'i shqyrtojë të gjitha ankesat dhe brenda afatit prej 15 ditëve nga data e parashtrimit të ankesës, t'iu kthej përgjigje me shkrim atyre që kanë adresuar ankesën.

4.6 Komisioni i emëruar nga Kuvendi i Komunës, përmes zyrës për informim, informon qytetarët 15 ditë para datës së mbajtjes së tubimit të qytetarëve për zgjedhjen e këshillave lokale, përmes:

4.6.1 Shpalljeve publike të vendosura në objektet publike dhe vendet më të frekuentuara brenda territorit ku mbahen tubimet për zgjedhjen e këshillave lokale;

4.6.2 Mediave lokale;

4.6.3 Web-faqes zyrtare të Komunës.

4.7 Njoftimi për publikun duhet të përmbajë:

4.7.1 Rendin e ditës;

4.7.2 Datën;

4.7.3 Kohën dhe

4.7.4 Vendin e mbajtjes së tubimit.

4.8 Pas përfundimit të procesit zgjedhor të këshillave lokale, kryetarit të këshillave lokale, komisioni i formuar nga Kuvendi i Komunës pushon aktivitetin.

4.9 Në territorin e Komunës së Malishevës, formohen këto këshilla lokale si më poshtë:

4.9.1 Këshilli lokal i lagjeve urbane: Malisheva 1 (Lagja e Gurit, Hoti, Mirdita, Lagja e Re),

4.9.2 Këshilli lokal i lagjeve urbane: Malisheva 2 (Lagja Veselaj, Hysenaj, Matoshi, Mekaj),

4.9.3 Këshilli lokal i fshatrave: Damanek, Bubël, Qupevë,

4.9.4 Këshilli lokal i fshatrave: Mleqan, Pllaqicë, Gollubovc,

4.9.5 Këshilli lokal i fshatrave: Astrazup, Burim,

4.9.6 Këshilli lokal i fshatrave: Shkozë, Janqishtë,

4.9.7 Këshilli lokal i fshatrave: Dragobil, Maxharrë,

4.9.8 Këshilli lokal i fshatrave: Pagarushë, Guriq,

4.9.9 Këshilli lokal i fshatrave: Ngucat, Temeqinë,

4.9.10 Këshilli lokal i fshatrave: Marali, Gajrak,

4.9.11 Këshilli lokal i fshatrave: Banjë, Kërvasari,

4.9.12 Këshilli lokal i fshatrave: Bellanicë, Lladrovic,

4.9.13 Këshilli lokal i fshatrave: Lladroc, Senik

4.9.14 Këshilli lokal i fshatrave: Gurbardh, Mirushë,

4.9.15 Këshilli lokal i fshatrave: Kijevë, Bubavec;

4.9.16 Këshilli lokal i fshatrave: Panorc, Rud, Llapqevë,

4.9.17 Këshilli lokal i fshatrave: Drenoc, Vërmicë,

4.9.18 Këshilli lokal i fshatrave: Llazicë, Balincë,

- 4.9.19 Këshilli lokal i fshatrave: Carrallukë, Shkarashnik,
- 4.9.20 Këshilli lokal i fshatrave: Tërpezë, Tërpezë e Poshtme,
- 4.9.21 Këshilli lokal i fshatrave: Berishë, Fshat i Ri,
- 4.9.22 Këshilli lokal i fshatrave: Turjakë, Lubizhdë

Neni 5

Formimi i këshillave lokale dhe kriteret e përzgjedhjes

5.1 Këshilli lokal i fshatit, vendbanimit apo lagjes urbane mund të ketë nga 5 (pesë) deri 9 (nëntë) anëtarë. Numri i saktë i anëtarëve për secilin këshill lokal, përcaktohet nga vetë banorët e fshatit, vendbanimit dhe lagjeve urbane që janë të pranishëm në tubimin zgjedhor.

5.2 Çdo fshat, vendbanim apo lagje urbane duhet të jetë i përfaqësuar në këshillin lokal. Në raste kur këshilli lokal ka numër çift të fshatrave, vendbanimeve apo lagjeve urbane, fshati, vendbanimi apo lagjja urbane me numër më të madh të banorëve jep dy anëtarë në këshillin lokal.

5.3 Përbërja e këshillave lokale duhet të reflektojë përbërjen etnike dhe gjinore. Përfaqësimi gjinor duhet të përfshijë minimum 30% të gjinisë femërore, sipas Ligjit për Barazi Gjinore. Në rast se në fshat, vendbanim apo lagje urbane jetojnë pjesëtarë të komuniteteve jo shumicë, duhet të jenë të përfaqësuar në këshillin lokal nëse janë të pranishëm në tubim. Nëse kemi më shumë se një komunitet të pakicës, komuniteti që ka shumicën duhet të përfaqësohet në këshillin lokal.

5.4 Fshatrat, vendbanimet dhe lagjet urbane të Komunës zgjedhin anëtarët e këshillit lokal me rastin e tubimit me qytetarë që mblidhen të gjithë banorët e interesuar të fshatit, vendbanimit dhe lagjes urbane.

5.5 Zgjedhja bëhet përmes votimit të fshehtë në tubimin e qytetarëve.

5.6 Kandidatët për anëtar të këshillave lokale duhet të jenë banorë të përhershëm në atë lokalitet.

5.7 Kandidatët për pozita të anëtarëve, kryetarit të këshillit lokal nuk mund të kandidohen nëse janë të zgjedhur në poste politike.

5.8 Anëtar të këshillave lokale të fshatrave, vendbanimeve dhe lagjeve urbane, zgjedhen kandidatët të cilët fitojnë numrin më të madh të votave nga numri i përgjithshëm i banorëve të fshatit, vendbanimit apo lagjes urbane që janë të pranishëm në tubimin zgjedhor.

5.9 Kryetari i këshillit lokal zgjedhet nga radhët e anëtarëve të këshillit lokal të fshatit, vendbanimit apo lagjes urbane, kandidati i cili fiton shumicën e votave të qytetarëve

që marrin pjesë në atë tubim. Nëse në rrethin e parë të votimit kemi dy apo më shumë kandidatë me numër të barabartë të votave, atëherë organizohet rrethi i dytë i votimit dhe kandidati që merr më shumë vota zgjedhet kryetar i këshillit lokal.

5.10 Të drejtë vote kanë të gjithë banorët me moshë mbi 18 vjeç të atij lokaliteti. Numri i kandidatëve të propozuar për këshill lokal duhet të jetë më i lartë se numri i përcaktuar për tu zgjedhur.

5.11 Anëtarët, kryetari, nënkryetari i këshillit lokal të fshatrave, vendbanimeve dhe lagjeve urbane, zgjedhen me mandat 4 vjeçar, me mundësi të rizgjedhjes edhe për një mandat.

5.12 Tubimet kanë legjitimitet juridik, nëse në tubime janë të pranishëm së paku 25 pjesëmarrës me të drejtë vote të atij lokaliteti, që duhet përfshijë së paku 30% të gjinisë femërore.

Neni 6

Ndërpreja dhe pushimi i mandatit të anëtarëve, kryetarit të këshillave lokale

6.1 Në raste kur qytetarët konsiderojnë se anëtarët dhe kryetari i këshillit lokal nuk i kanë përmbushur obligimet që dalin nga kjo rregullore, anëtarët dhe kryetari i këshillit lokal mund të shkarkohen më shumicën e votave të banorëve të fshatit, vendbanimit apo lagjes urbane me rastin e tubimit publik me qytetarë.

6.2 Në mënyrë që të bëhet ky votim, kërkohet një petition për ndërprerjen e mandatit që duhet të nënshkruhet nga banorët e fshatit, vendbanimit apo lagjes urbane. Ky petition duhet të mbledh nëshkrimet e më shumë se gjysma e numrit të pjesëmarrësve nga takimi ku është zgjedhur këshilli lokal. Peticioni protokollohet dhe i dorëzohet Drejtorisë së Administratës dhe sektorit për punët e Kuvendit, të cilët pastaj e procedojnë tek anëtarët e komisionit të formuar sipas nenit 4 pika 1, të cilët anëtarë duhet të lajmërohen paraprakisht për një mbledhje të tillë.

6.3 Në rastet kur këshilli lokal shkarkohet sipas procedurave të parapara në paragrafin 2, një votim i ri duhet të bëhet menjëherë, në bazë të procedurave të nenit 5 të kësaj rregulloreje, në mënyrë që të zgjedhet një këshill i ri lokal. Rezultatet e votimit duhet të raportohen në bazë të kërkesave të nenit 6 të kësaj rregulloreje.

6.4 Mandati i kryetarit dhe anëtarëve të këshillave lokale përfundon:

6.4.1 Me kryerjen e mandatit,

6.4.2 Nëse vdes,

6.4.3 Nëse jep dorëheqje,

6.4.4 Nëse ndërron vendbanim,

6.4.5 Nëse shkarkohet.

6.4.6 Nëse kryen vepër penale dhe me vendim të formës së prerë dënohet me burgim për tre (3) ose më tepër muaj.

Neni 7

Procesverbali nga tubimi zgjedhor

7.1 Procesverbali i hartuar nga tubimi i qytetarëve duhet të përmbajë datën, orën dhe vendin e mbajtjes së tubimit, numrin e qytetarëve që kanë marrë pjesë në tubim, listën e pjesëmarrësve, të dhënat për zgjedhjen e anëtarëve dhe kryetarit të këshillave lokale, procedurat e votimit dhe çështje të tjera të adresuara në takim.

7.2 Procesverbalin e nënshkruajnë kryesuesi i tubimit, anëtarët e komisionit dhe procesmbajtësi, ndërsa komisioni i përcaktuar sipas nenit 4 të kësaj rregulloreje i raporton Kuvendit të Komunës për rrjedhën e tubimit dhe për zgjedhjen e këshillave lokale të fshatit, vendbanimit dhe lagjes urbane.

7.3 Rezultatet e zgjedhjeve, emrat e anëtarëve dhe kryetarit të këshillit lokal, duhet të bëhen publik menjëherë pas tubimit zgjedhor.

Neni 8

Konsultimet ndërmjet komunës dhe këshillave lokale

8.1 Kryetari i Komunës, Kryesuesi i Kuvendit dhe Drejtori për Administratë, ftojnë përfaqësuesit e fshatrave, vendbanimeve dhe lagjeve urbane që të marrin pjesë në tubimet publike me qytetarë, në dëgjimet publike për buxhet, tubimet e rregullta publike, takimet për planifikimin e politikave zhvillimore komunale që organizohen nga organet komunale.

8.2 Së paku një anëtar i këshillit lokal të fshatit, vendbanimit apo lagjes urbane duhet të jetë i përfshirë në të gjitha grupet punuese komunale për planifikim të planeve urbane, zhvillimore dhe rurale që janë pjesë e lokalitetit ku ata jetojnë.

8.3 Kryetari i Komunës duhet të organizojë së paku dy takime në vit me udhëheqësit e këshillave lokale. Takimet duhet të mbahen së paku një herë në gjashtë muaj. Për rendin e ditës duhet të konsultohen edhe udhëheqësit e këshillave lokale.

8.4 Kuvendi i Komunës mund të kërkojë një opinion nga këshilli lokal i fshatit, vendbanimit dhe lagjes urbane për çështje të caktuara me interes për komunitetin.

Neni 9

Bartja e aktiviteteve nga komuna të këshillat lokale

9.1 Me kërkesë të këshillit lokal dhe rekomandimin e Kryetarit të Komunës apo ndonjë komiteti të Kuvendit, Kuvendi i Komunës me vendim mund të bartë disa përgjegjësi për t'i ushtruar këshillat lokale të fshatit, vendbanimit dhe lagjes urbane. Aktivitetet që mund të barten, duhet të jenë në kompetencë ekskluzive vetanake të Komunës.

9.2 Këshilli lokal i fshatit, vendbanimit dhe lagjes urbane duhet të konsultohet dhe të pranoj bartjen e aktiviteteve nga Kuvendi i Komunës në këshillin lokal.

9.3 Në rast të bartjes së aktiviteteve nga komuna në këshillin lokal, komuna do të angazhohet të ofrojë mbështetje dhe burime të mjaftueshme për zyrat lokale/këshillat e fshatrave, vendbanimeve dhe lagjeve urbane me qëllim të përmbushjes së përgjegjësi të bartuara.

Neni 10

Roli, detyrat dhe përgjegjësitë e këshillave lokale

10.1 Këshilli lokal i fshatit, vendbanimit apo lagjes urbane mund të takohet në çdo kohë për të shqyrtuar çështjet me interes të lokalitetit si dhe harton dhe miraton planin e punës së këshillit dhe rregullat e brendshme të funksionimit.

10.2 Këshilli lokal i fshatit, vendbanimit dhe lagjes urbane, organizon, përcjell dhe planifikon planet dhe programet zhvillimore të lokalitetit në të gjitha sferat në bashkëpunim me Kryetarin e Komunës, Kryesuesin e Kuvendit, komitetet dhe drejtoritë komunale.

10.3 Këshilli lokal i fshatit, vendbanimit dhe lagjes urbane duhet të informojë komunën për kohën dhe agjendën e takimeve, zyrtar kompetent komunal mund të marrin pjesë në takimet e organizuara nga këshillat lokale.

10.4 Takimet e qytetarëve mund të organizohen me iniciativën e këshillit lokal të fshatit, vendbanimit apo lagjes urbane.

10.5 Këshilli lokal mund të ndërmarrë aktivitetet, të cilat në veçanti ndikojnë në:

10.5.1 Zhvillimin lokal ekonomik të qëndrueshëm të lokalitetit,

10.5.2 Planifikimin urban dhe rural të lokalitetit,

10.5.3 Mbrojtjen e mjedisit lokal të lokalitetit,

10.5.4 Rritjen e efikasitetit në ofrimin e shërbimeve publike komunale brenda lokalitetit,

10.5.5 Sigurimin e të dhënave elementare për çdo familje të lokalitetit përkatës,

- 10.5.6 Mirëmbajtjen e varrezave dhe hapësirave publike të gjelbëruara,
- 10.5.7 Zhvillimin rural,
- 10.5.8 Organizimin e aktiviteteve kulturore dhe sportive,
- 10.5.9 Bashkëpunimin me organet e komunës dhe organizatat tjera të shoqërisë civile për çështjet me interes për lokalitetin,
- 10.5.10 Organizimin e aksioneve vullnetare në interes për lokalitetin, zbatimin e aktiviteteve që janë bartur sipas procedurave të nenit 9 të kësaj rregulloreje.

10.6 Me vendimin e kryetarit të Komunës, një anëtar i këshillit lokal mund të jetë pjesë e organeve mbikëqyrëse për monitorimin, zbatimin e projekteve për investime kapitale në lokalitet të tyre.

10.7 Këshillat lokale të fshatrave, vendbanimeve dhe lagjeve urbane kanë të drejtë të bashkëpunojnë në mes veti në territorin e komunës përkatëse.

10.8 Këshillat lokale kanë të drejtë të parashtrojnë kërkesë më shkrim organeve kompetente të komunës për çështje të ndryshme në interes të lokaliteti, kurse organet e komunës brenda afatit 45 ditë i përgjigjen me shkrim këshillit lokal që ka parashtruar kërkesën.

Neni 11

Roli dhe detyrat e kryetarit dhe nënkryetarit të këshillave lokale

1 1.1. Kryetari përfaqëson fshatin, vendbanimin dhe lagjen urbane në konsultimet dhe diskutimet me organet e komunës, informon anëtarët e këshillit për rezultatet ose konkluzionet e dalura nga takimet, thërret anëtarët e këshillit për mbledhjen e këshillit lokal, udhëheq me mbledhjen e këshillit lokal, nënshkruan konkluzionet dhe propozimet e miratuara nga ana e këshillit lokal dhe është i obliguar që në afat prej 15 ditësh nga dita e miratimit të tyre t'i dorëzoj te Kryetari i Komunës.

Neni 12

Financimi i aktiviteteve

12.1 Financimi i aktiviteteve të këshillave lokale mund të bëhet nga vetë banorët e fshatit, vendbanimit apo lagjes urbane, nga komuna, nga financimi i përbashkët si dhe nga donatorët në pajtueshmëri të plotë më statutin, rregulloret komunale dhe legjislacionin e zbatueshëm në Republikën e Kosovës për menaxhim të financave publike.

12.2 Këshilli lokal përgatitë raportet gjashtë mujore dhe vjetore të mjeteve të arkëtuara dhe mjeteve të shpenzuara dhe i bën ato transparente për qytetarët e atij lokaliteti dhe organet komunale.

Neni 13

Kompensimi i këshillave lokale

13.1. Për punën e tyre këshillat lokale kompensohen nga buxheti i komunës.

13.2. Kompensimi për këshillat lokale duhet të rregullohet me një vendim të veçantë.

13.3. Kompensimi për punën e këshillave lokale bëhet vetëm për 6 takime të mbajtura gjatë vitit.

Neni 14

Mospërbushja e përgjegjësi

Këshilli lokal i fshatit, vendbanimit dhe lagjes urbane përkatëse mban obligime dhe përgjegjësi ligjore për të gjitha aktivitetet e bartura nga Kuvendi i Komunës në këshillin lokal.

Neni 15

Dispozitat kalimtare, shfuqizuese dhe përfundimtare

15.1 Në rast të konfliktit të dispozitave të kësaj rregulloreje me Ligjin për Vetëqeverisjen Lokale dhe Statutin e Komunës, mbizotërojnë dispozitat e Ligjit dhe Statutit.

15.2 Me hyrjen në fuqi të kësaj rregullore shfuqizohet rregullorja për organizimin e bashkësive, fshatrave, vendbanimeve dhe lagjeve urbane Nr. 110-56 të datës 05.05.2009.

Neni 16

Plotësimet, ndryshimi dhe zbatimi

16 Ndryshimet dhe plotësimet eventuale në këtë rregullore do të bëhen sipas procedurës së njëjtë të aprovimit të kësaj rregulloreje.

16.1 Për zbatimin e kësaj rregullore do të kujdeset Kryetari i Komunës dhe Drejtoria për Administratë.

Neni 17

Hyrja në fuqi

Kjo rregullore hyn në fuqi pas miratimit nga Kuvendi i Komunës së Malishevës dhe pesëmbëdhjetë (15) ditë pas regjistrimit në zyrën e protokollit në Ministrinë e Administrimit të Pushtetit Lokal si dhe shtatë (7) ditë pas publikimit në web-faqen e Komunës.

